


| Tertib Surah | Nama Surah | Bilangan Ayat | Bilangan Ruku' | Makkiyyah / Madaniyyah | Tertib Turun | Bilangan Paragraf |
|--------------|------------|---------------|----------------|------------------------|--------------|-------------------|
| Ke-71 | Nuh | 28 | 2 | Makkiyyah | Ke-71 | 5 |



Zaman Diturunkan

Surah Nuh mungkin sekali diturunkan selepas berlakunya hijrah ke Habsyah di akhir tahun ke-5 Kenabian. Pada ketika itu penentangan pihak musyrikin Mekah sudah pun mulai kuat. Di dalam surah ini, para sahabat yang baru memeluk agama Islam diminta bersabar dan beristiqamah dalam berda'wah dan mereka diminta supaya menjadikan da'wah Nabi Nuh yang begitu lama sebagai panduan dan contoh, selain itu orang-orang Quraisy juga diberi amaran jika mereka menolak seruan tauhid dan tidak bertaubat, nescaya mereka boleh saja dibinasakan seperti kaum Nuh dahulu.

Perkaitan Surah Nuh Dengan Surah Sebelum Dan Selepasnya

Di dalam Surah al-Ma'arij sebelum ini telah dikemukakan gambaran tentang hari kiamat, di dalamnya juga telah dinyatakan akibat buruk yang akan diterima manusia kedekut di hari akhirat nanti, selain itu orang-orang kafir juga diancam dengan azab dunia berupa penukaran suatu bangsa dengan bangsa yang lain mengambil tempatnya. Di dalam Surah Nuh ini pula untuk manusia terhindar daripada azab dunia dan akhirat, mereka hendaklah mengambil i'tibar daripada seruan dan da'wah Nabi Nuh yang dikemukakan dengan terperinci. Di dalam Surah al-Jin selepas ini disebutkan tentang kalangan jin yang bertuah, kerana setelah mereka mendengar al-Qur'an mereka terus berda'wah dan menyeru sesama mereka kepada ajaran Islam.

Beberapa Kata Kunci Dan Tema Utama Surah

1. Di dalam Surah Nuh disebutkan adab-adab dan disiplin da'wah.
2. Di dalam surah ini juga dinyatakan selain menyeru manusia kepada 'aqidah tauhid, kerasulan dan kepercayaan kepada hari kemudian, manusia hendaklah diberi ancaman tentang akibat menolak 'aqidah 'aqidah tersebut.
3. Di dalam Surah Nuh, manusia diseru supaya benar-benar merasai bahaya dan keburukan dosa-dosa lalu mereka diseru supaya beristighfar, di samping itu kelebihan istighfar juga dinyatakan. اِسْتَغْفِرْ (Ayat: 10) dan مَغْفِرَةً (Ayat: 4, 6 dan 28). Perkataan-perkataan ini diulangi beberapa kali.
4. Di dalam surah ini doa-doa Nabi Nuh disebutkan, setelah Baginda menyeru manusia kepada agama Allah selama 950 tahun, dikatakan bahawa tidak akan ada lagi orang yang akan beriman kepadanya, lalu doa keburukan Nabi Nuh dikemukakan.
5. Kaum Nuh telah diseru supaya taat kepada Allah dan RasulNya (Ayat: 3) tetapi kaumnya menderhaka (Ayat: 21).
6. Di dalam Surah Nuh disebutkan 2 macam kepemimpinan, pertama; kepemimpinan Nabi Nuh yang shaleh dan baik dan keduanya ialah kepemimpinan orang-orang kafir yang musyrik.

(a) Setelah menyeru manusia supaya beristighfar, Nabi Nuh telah memberi berita gembira bahawa jika mereka beristighfar, nescaya Allah menambahkan lagi harta dan anak-anak kepada mereka (Ayat: 12).

وَيُؤْتِيكُمْ فِي مَوَالٍ وَبَنِينَ وَيَجْعَلْ لَكُمْ جَنَّاتٍ وَيَجْعَلْ لَكُمْ أَنْهَارًا ﴿١٢﴾

12. "Dan Ia akan memberi kepada kamu dengan banyaknya harta kekayaan serta anak-pinak; dan Ia akan mengadakan bagi kamu kebun-kebun tanaman, serta mengadakan bagi kamu sungai-sungai (yang mengalir di dalamnya).

(b) Tetapi kaum Nuh sebaliknya mengikut kepemimpinan orang musyrik, kerana itu harta benda dan anak-anak mereka tidak bertambah sebaliknya mereka semakin rugi (Ayat: 21).

قَالَ نُوحٌ رَبِّ إِنَّهُمْ عَصَوْنِي وَأَتَّبِعُوا مَن لَّمْ يَزِدْهُ مَالَهُ وَزَلَّهُ إِلَّا خَسَارًا ﴿٢١﴾

21. Nabi Nuh (merayu lagi dengan) berkata: "Wahai Tuhanku! Sesungguhnya, mereka telah menderhaka kepadaku, dan mereka telah menurut orang yang harta bendanya dan anak-pinaknya tidak menambahinya melainkan kerugian (di akhirat kelak).